

# Orang Islam yang Terkemuka

**Musa bin Nusayr**

(2)

Musa bin Nusayr, bukanlah seorang yang nekad mengadu nasib, atau perompak, ataupun orang yang hanya mengumpulkan sebanyak-banyaknya rampasan perang, tetapi ia seorang pahlawan Islam dari kalangan ((orang-orang tabiin)) yang telah menurut jejak sahabat-sahabat Nabi dengan cara yang sebaik-baiknya. Ia seorang mubaligh yang menyiarluarkan Islam dalam sebuah negeri – negeri Barbar di Afrika Utara – yang telah kukuh di dalamnya penyembahan berhala dan diperintahkan oleh raja perempuan ahli sihir.

Musa bin Nusayr telah meletakkan berbelas-belas ribu orang Arab dalam kalangan orang-orang Barbar di Afrika Utara untuk mengajar mereka membaca Qur'an, mendidik mereka dengan akhlak dan kebudayaan Islam, dan mendalami pengetahuan mereka dengan ilmu dan hukum-hukum Islam.

Demikian kata *al-Ustādh* Muhammad Abdul Ghani Hasan, Mesir, dalam bukunya (*(Musa bin Nusayr)*).

**(Terjemahan: Abdullah Basmeh)**

Di negeri ((orang-orang Barbar))

Kerja-kerja yang telah dijayakan oleh Musa bin Nusayr

berkenderakan unta. Daerah Zaghouan itu ialah ibarat

benteng kebal tempat orang-orang Barbar berhimpun dan

keluar menyerang. Musa pun menghantarkan kepada mereka

lima ratus orang pahlawan yang gagah berani. Setelah

kedua-dua pihak bertempur maka akhirnya tentera Islam berjaya

menguasai daerah itu dan menawan sepuluh ribu orang.

Inilah tawanan perang yang pertama sekali dibawa masuk

ke bandar al-Qayrawan semenjak Musa bin Nusayr memegang

jawatan pesuruhjaya di Afrika Utara.

Musa bin Nusayr pun menghantarkan pasukan

tentera peninjau dari bandar al-Qayrawan yang telah dijadikan

pengkalan perang, dan pusat bagi menghantarkan bantuan

dan bekalan. Musa pula seorang yang kaya anak,

Allah, sekalipun mereka gugur syahid pada jalan

Allah dalam menjayakannya.

Ia pun menuju ke daerah Zaghouan yang jaraknya dari

bandar al-Qayrawan kira-kira sehari perjalanan dengan

Allah ‘Azza wa Jalla telah memberikan berkat kepadanya dengan membiakkkan anak-anaknya dan banyak di antaranya yang telah besar panjang dan menjadi pahlawan yang gagah berani, salin tak tumpah seperti sifat-sifat bapa mereka menepati bidalan Arab yang berbunyi:

“*Al-waladu sirru abīh*” (anak itu ialah rahsia bapanya).

– Bapa borek anaknya rintik.

Musa bin Nusayr pun menghantarkan anaknya, ‘Abd Allāh, memimpin satu angkatan tentera ke suatu daerah untuk menyeru penduduknya kepada Islam dan memerangi mana-mana yang bangun melawan. Oleh kerana orang-orang ((Barbar)) di situ tidak mahu menerima Islam dan tidak mahu tunduk kepada pemerintah Islam yang sedang berkuasa, maka pertempuran pun berlaku dan tentera Islam yang sedikit jumlahnya tetapi penuh semangat dan beriman, dapat mengalahkan pihak lawannya dengan kemenangan-kemenangan yang cemerlang.

‘Abd Allāh telah berjaya menawan dan membawa orang-orang tawanan sebanyak seratus ribu, dan saudaranya Marwān (yang telah dihantarkan ke daerah lain) telah juga berjaya membawa orang-orang tawanan sebanyak seratus ribu pula.

Harta-harta rampasan perang yang mereka dapati adalah tidak terhitung bahkan tidak ada tolok bandingannya. Perkara ini, baik tentang bilangan orang-orang tawanan mahupun tentang banyaknya harta-harta rampasan perang, bukanlah satu perkara yang melampau-lampau atau terlalu, kerana kebanyakan ahli-ahli tawarikh menyebutkan bahawa jumlah orang-orang tawanan yang telah ditawan oleh tentera Islam yang dipimpin oleh Musa bin Nusayr tidak ada tolok bandingnya sepanjang-pantjang sejarah Islam.

Jumlah orang-orang tawanan dan harta-harta rampasan perang yang demikian besarnya telah menjadikan ‘Abd al-‘Azīz bin Marwān,

raja muda yang menguasai Mesir dan Afrika Utara bagi pihak Khalifah Banī Umayyah, menaruh syak tentang jumlah yang sebesar itu. Hukum Islam mengenai pembahagian harta-harta rampasan perang telah sedia pembaca mengetahuinya, kerana Allah ‘Azza wa Jalla telah berfirman di dalam sūrat al-Anfāl (yat 41):

“*Wa i’lamū annamā ghanīmūtum min shay’ in fa anna lillāhi khumusahū, wa li al-rasūli, wa lidhī al-qurbā, wa al-yatāmā, wa al-masākīn, wa ibni al-sabīlī in kuntum āmantum billāh, wa mā anzalnā ‘alā ‘abdinā yawma al-furqān, yawma iltaqā al-jam’ān. Wallāhu ‘alā kulli shay’ in qadīr*”.

Ertinya: “Dan ketahuilah, bahawa apa yang kamu rampas (di dalam peperangan), maka sesungguhnya seperlimanya bagi Allah, dan bagi Rasul, dan bagi keluarga yang dekat (yakni keluarga Nabi), dan bagi anak-anak yatim, dan bagi orang-orang miskin, dan orang musafir, jika kamu betul beriman kepada Allah, dan (beriman kepada) apa yang Kami turunkan kepada hamba Kami pada ((Hari Furqān)) (Hari Pemisahan – antara yang benar dengan yang salah), iaitu hari bertemu dua kumpulan (tentera Islam dengan tentera kaum jahiliah di medan perang Badar). Allah, adalah berkuasa atas tiap-tiap sesuatu.”

Oleh sebab itu, sudah semestinya seperlima daripada rampasan perang akan dihantarkan kepada Khalifah untuk dibahagikan kepada orang-orang yang berhak menerimanya sebagaimana yang diperintahkan oleh Allah ‘Azza wa Jalla. Apabila Musa bin Nusayr menghitungnya untuk dikeluarkan yang seperlima itu maka nyatahal jumlah bahagian yang tersebut ialah sebanyak enam puluh ribu.

Musa pun menulis kepada ‘Abd al-‘Azīz bin Marwān, menyampaikan berita gembira tentang kemenangan yang cemerlang yang telah dikurniakan oleh Allah ‘Azza wa Jalla kepada tentera Islam di Afrika

Utara, dan juga telah menyatakan bahawa jumlah seperlima yang telah dikeluarkan daripada rampasan perang itu ialah sebanyak enam puluh ribu. Tetapi jurutulis yang menulis surat itu telah terkeliru dalam menuliskan jumlah bilangannya, dan tersalah menulisnya, lalu dijadikannya tiga puluh ribu sahaja.

Sampailah surat itu kepada ‘Abd al-‘Azīz bin Marwān di Mesir, pusat pemerintahannya. Apabila ia membaca bahawa jumlah yang seperlima itu ialah sebanyak tiga puluh ribu, terasalah bahawa jumlah itu terlalu besar, dan menyangka bilangan itu tersalah tulis oleh jurutulis, kerana jumlah itu amat besar dari yang difikirkannya. Ia pun memanggil jurutulisnya lalu merencanakan sepucuk surat kepada Musa bin Nusayr demikian isinya:

“Suratmu selamat diterima, kamu menyebut bahawa seperlima dari rampasan perang yang telah dikurniakan Allah kepadamu ialah sebanyak tiga puluh ribu orang. Aku fikir jumlah itu terlalu besar, dan aku percaya jurutulis itu terkeliru. Oleh itu tulislah kepada aku tentang hakikat perkara ini yang sebenarnya.”

(Menurut hukum Islam, orang-orang kafir – lelaki dan perempuan – yang ditawan dalam perang sabil, dijadikan hamba abdi – Penterjemah).

Belayarlah pembawa surat meredah padang pasir, dan menembusi celah-celah gunung-ganang dan tanah-tanah lembah, sehingga tiba di tempat Musa bin Nusayr di Afrika Utara lalu diserahkan surat itu kepadanya. Musa pun membuka surat itu lalu dibaca, dan mengetahuilah ia bahawa ‘Abd al-‘Azīz memandang terlalu banyak tiga puluh ribu, maka bagaimakah pula kalau diketahuinya jumlahnya yang sebenar, yang telah tersalah jurutulis menuliskannya, yang berjumlah enam puluh ribu itu?

Pada saat itu Musa pun merencanakan sepucuk surat kepada jurutulisnya, seperti berikut:

“Jumlah itu tidak betul sebagaimana yang disangka oleh tuan, kerana jurutulis telah terkeliru dan telah tersalah menulisnya. Jumlah seperlima yang betul ialah enam puluh ribu orang, dan telah sabit dengan tidak syak lagi!”

Surat itu pun dibawa ke Mesir oleh utusan ‘Abd al-‘Azīz bin Marwān, dan setelah dibuka dan mengetahui bahawa jumlah itu ialah enam puluh ribu bukan tiga puluh ribu: amatlah sukacitanya mengenangkan limpah kurnia Allah kepada orang-orang Islam, tetapi sukacitanya itu tidak juga dapat menghilangkan perasaan takjubnya terhadap jumlah yang demikian besarnya.

Kejadian ini menjadikan kedudukan Musa bin Nusayr bertambah tinggi di sisi pelindung dan pendidiknya: ‘Abd al-‘Azīz bin Marwān dari satu segi, dan di sisi Khalifah ‘Abd al-Malik bin Marwān dari segi yang lain. Kejadian ini telah dijadikan satu kesempatan yang baik oleh ‘Abd al-‘Azīz untuk membenarkan pendiriannya tentang pemecatan panglima tentera di Afrika Utara – Ḥasān bin al-Nu’man untuk digantikan oleh Musa bin Nusayr. Ia telah pun menulis kepada Khalifah tentang itu. Tidak berapa antaranya, ‘Abd al-‘Azīz menerima surat Khalifah ‘Abd al-Malik. Kandungannya seperti berikut:

“Telah sampai kepada *Amīr al-Mu’mīnīn* apa yang kamu nyatakan tentang pemecatan Ḥasan untuk digantikan oleh Musa. *Amīr al-Mu’mīnīn* bersetuju akan cadanganmu itu dan telah melantik orang yang kamu pilih itu”.

Apabila daerah-daerah Islam di Afrika Utara makin bertambah luas dan makin bertambah besar pula rampasan-rampasan perang yang dicapai oleh Musa bin Nusayr, ‘Abd al-‘Azīz pun

menulis kepada Khalifah tentang kejayaan itu.

Pada ketika itu yakinlah Khalifah bahawa saudaranya ‘Abd al-‘Azīz bin Marwān yang sedang memegang terajua<sup>1</sup> pemerintahan Mesir dan Afrika Utara, sangat arif orangnya tentang memilih pahlawan-pahlawan yang cekap. Khalifah ‘Abd al-Malik pun menghantarkan orang-orangnya dari Damsyik ke Afrika Utara untuk menerima seperlima rampasan perang daripada Musa bin Nusayr untuk dibahagikan kepada orang-orang yang berhak menerimanya.

(Empat bahagian yang lain, menurut hukum Islam, dibahagikan kepada tentera Islam yang telah berjuang dan mencapai kemenangan itu – Penterjemah).

Musa pun menyerahkan bahagian yang seperlima itu kepada orang-orang Khalifah.

Kemenangan-kemenangan yang cemerlang ini menjadikan Musa dan tentera Islam yang dipimpinnya mara terus-menerus. Pada masa itu ia sedang ditentang oleh dua kekuatan di Afrika. Pertama: Orang-orang (Barbar) yang belum masuk Islam dan tidak pula mahu tunduk taat. Mereka ialah suatu kaum yang gagah dan tahan lasak berperang. Kekuatan yang kedua pula ialah orang-orang Rom yang telah menjajah Afrika Utara.

(Akan diingat, penjajahan Rom di Syria, Palestin dan Mesir telah dihancurkan oleh tentera Islam dalam zaman Sayidina ‘Umar bin al-Khattāb – Penterjemah).

Sebelum Musa bin Nusayr, tentera Rom dan tentera Islam telah bertempur dengan hebatnya di Afrika Utara dan banyaklah yang telah terkorban dari kedua belah pihak. Di antara pahlawan-pahlawan Islam yang telah gugur syahid dalam peperangan sabil itu ialah Zuhayr bin Qays dan ‘Uqbah bin Nāfi‘. ‘Uqbah yang sedang memimpin satu pasukan kecil telah dikepung oleh Rom dan gugur syahid dalam tahun 63 Hijriyyah.

Segala halangan dan rintangan di sepanjang jalan Musa

bin Nusayr telah dapat disingkirkannya. Ia kerap kali berasa gembira dengan tanda-tanda dan alamat yang menunjukkan kemujurannya dan bintangnya yang terang. Ketika ia mula jejak di negeri Barbar di Afrika Utara, sebagaimana yang disebutkan oleh sejarah, ia telah berhenti rehat di pertengahan jalan bersama-sama orang-orangnya setelah puas meredah padang sahara dan banyak kalinya merempuh medan-medan

Sambungannya pada muka 30

oo

### Bacalah!

#### Florinda Puteri Sepanyol

#### Terjemahan: Abdullah Basmeh

“Florinda Puteri

Sepanyol” ialah sebuah cerita yang indah dan menarik, buah kalam Jurji Zaydan, pengarang Mesir yang terkenal.

Ikutilah bagaimana angkatan tentera Islam yang dipimpin oleh pahlawan Islam yang masyhur – Tāriq bin Ziyād, menggempur tentera Sepanyol dan menghancur leburkan pertahanan.



Semenjak itu, Islam telah mendirikan kerajaan dan tamadun yang tinggi di Semenanjung Sepanyol dan berkekalan menyinari benua Eropah sepanjang masa delapan kurun.

2 penggal tamat. Sepenggal \$1.20

(Naskhah rumi: Sebuah \$3.00)

#### Pesanlah kepada penerbitnya:

#### Qalam, Singapura

<sup>1</sup> Perkataan sebenar ialah teraju.

## Musa bin Nusayr

Sambungan dari muka 21

pertempuran dengan musuh dalam masa mereka berehat menikmati udara yang nyaman, tiba-tiba seekor burung kecil diterbangkan oleh angin yang kencang dan mencampakkannya di atas dada Musa bin Nusayr. Burung itu pun menggelepar di atas dada pahlawan yang gagah berani itu. Dengan tidak bertangguh lagi, Musa mengambil burung itu lalu disembelih dan darahnya dipalitkan pada pakaianya mulai dari atas dadanya. Bulu burung itu pun dicabut-cabut dan ditaburkan di atas badannya sambil berkata: Inilah dia kemenangan demi Allah *Rabb al-Ka 'bah..!*

Peristiwa itu menjadi suatu sempena yang baik, kerana selepas itu Musa terus-menerus menempa kemenangan yang besar.

Maralah Musa lalu menggempur daerah ((Sajuma)).

Dalam pertempuran itu ketua-ketua dan orang-orang besar di situ telah terbunuh. Anak-anak ((Uqbah bin Nāfi')) memandang sudah sampai masanya mereka menuntut bela bapa mereka yang telah terbunuh di situ pada masa yang lalu. Mereka pun membunuh enam ratus orang dari kalangan orang-orang yang terkemuka di situ. Mereka tidak menyarung pedang melainkan setelah Musa memerintahkan mereka berhenti daripada membunuh pihak lawannya.

Dari sana, Musa mara lagi ke daerah-daerah Huwārah, Zinātah dan Kitāmah di negeri Barbar di Afrika Utara. Ia telah menggempur pihak lawannya dan membunuh sebahagian dari mereka serta menawan sebanyak lima ribu orang lelaki. Dalam kalangan orang-orang yang ditawan itu terdapat seorang pahlawan bernama ((Tamūn al-Barbari)). Tamūn

ini seorang yang ungkal, hatinya tidak dilapangkan oleh Allah untuk menerima Islam. Ia telah berkekalan dalam ungalnya dan terus menentang sehingga jatuh dalam tangan tentera Islam lalu ditawan. Musa pun menghantarkannya kepada

'Abd al-'Azīz bin Marwān di Mesir, tetapi ia telah terbunuh di pertengahan jalan berhampiran dengan sebuah kolam air, tidak jauh dari kampung ((Uqbah)). Kolam itu telah berkekalan menyandang nama ((Tamūn)) sepanjang beberapa kurun.

Musa bin Nusayr berjaya memegang kuasa di Afrika

Utara, dan menjadikan orang-orang Barbar dan Rom berasa takut dan gentar kepadanya. Hal ini menyebabkan daerah ((Kitāmah)) (yang masih dikuasai oleh kaum Barbar)

mengaku taat kepadanya lalu menghantarkan ketua-ketua dan orang besarnya mengadap Musa dan menyatakan taat setia.

Musa pun melantik salah seorang daripada mereka menjadi ketua, lalu diambilnya benda-benda yang menjadi cagaran daripada orang-orang pilihan dan kaum bangsawan mereka, sebagai jaminan bahawa mereka tidak akan berpaling tадah.

Musa bin Nusayr mara terus mencapai kemenangan dalam segala medan perjuangan, tidak dapat dihalangi oleh orang-orang Barbar dan Rom walau bagaimana besar angkatan tentera mereka. Dalam saat yang demikian, tiba-tiba datang berita kemangkatan Khalifah 'Abd al-Malik bin Marwān pada tahun 86 Hijriyyah yang telah digantikan oleh puteranya al-Walīd bin 'Abd al-Malik.

Bintang Musa bin Nusayr makin bertambah terang, kerana ia bukan asing lagi kepada Khalifah al-Walīd dan selalu pula mendapat timbang rasanya. Kalau 'Abd al-'Azīz bin Marwān – ketua pemerintahan Mesir dan Afrika Utara – yang menjadi pelindung dan pendidiknya, telah meninggal setahun yang lalu (pada tahun 85 Hijriyyah), maka ia (Musa) akan mendapat seorang pelindung dan

penyokong yang bukan kecil pengaruhnya. Orang ini ialah ((Umm al-Banīn)), isteri Khalifah al-Walīd. Bukanakah ia yang menghantarkan ((Umm al-Banīn)) dari Mesir ketika menjadi ((pengantin baharu)), kepada suaminya al-Walīd (putera Khalifah) di Damsyik? Sekarang ((Umm al-Banīn)) telah pun meningkat menjadi isteri Khalifah dan sudah selayaknya Musa bin Nusayr mendapat bantuan dan sokongannya. Sekurang-kurangnya untuk mengenang kedudukan Musa yang rapat dengan ayahandanya (ayahanda Umm al-Banīn): ‘Abd al-‘Azīz bin Marwān.

Khalifah al-Walīd bin ‘Abd al-Malik telah menulis memberi perintah supaya Musa bin Nusayr menjadi ketua pemerintahan Afrika Utara dan negeri Maghribi, untuk menggantikan bapa saudaranya (bapa saudara Khalifah), ‘Abd Allāh bin Marwān. Demikianlah, berpindahlah kuasa wilayah Islam di Afrika Utara yang luas itu ke tangan Musa bin Nusayr.

Di sini takdir telah menambahkan beban baharu di atas beban yang sedang dipikul oleh Musa bin Nusayr, dan telah meletakkan kepadanya tanggungan yang berat dengan menambahkan negeri Maghribi kepada wilayahnya yang ada di Afrika Utara.

Wilayah Afrika Utara itu dimulai dari ((Barqah<sup>1</sup>)) (Libya) dan berakhir kepada bandar ((al-Qayrawan)) (Tunis).

Manakala negeri Magribi pula dimulai dari sempadan bandar al-Qayrawan membawa ke barat yang amat luas tanahnya dan berakhir di pantai Lautan Atlantik.

Maralah Musa menuju ke barat dengan tidak mendapat sebarang tentangan. Orang-orang Barbar telah meninggalkan daerah masing-masing dengan dikejar oleh Musa dan tenteranya. Banyaklah di antara mereka yang telah dibunuhi dan ditawan.

Kejadian ini menyebabkan orang Barbar memandang bahawa mereka tidak akan dapat menentang lawan yang demikian gagah beraninya lalu menyerah kalah. Musa pun memberi jaminan bahawa nyawa dan harta benda mereka adalah terpelihara selagi

mereka berlaku taat, lalu diangkat seorang pegawai menguasai daerah itu.

Kemenangan ini menjadikan Musa mara lagi sehingga sampai di Tanjah (Tangier) di penghujung negeri Maghribi, yang terletak di selat yang terkenal sekarang dengan nama ((Selat Gibraltar)) (Selat *Jabal Tāriq*). Apabila Musa terasa akan kedudukannya yang kukuh dan terhindar dari segala bahaya setelah mencapai kemenangan yang cemerlang itu ia pun mengambil keputusan tidak mara lagi, lalu kembali ke pusat pemerintahannya di bandar al-Qayrawan dengan meninggalkan seorang pegawainya, pahlawan Islam yang terkenal – Tāriq bin Ziyād, menjadi pegawai daerah Tanjah.

Tāriq bin Ziyād, yang baharu sahaja tersebut namanya bagi pertama kali di sini, akan kita bertemu dengannya berkali-kali kelak. Tāriq ialah seorang pahlawan Islam yang mula-mula sekali mengibarkan bendera Islam di Semenanjung Sepanyol, ketika Musa bin Nusayr memerintahkan dia bertapak di negeri itu untuk menyiarkan Islam dan kebudayaannya di benua Eropah.

Dalam masa baliknya ke bandar al-Qayrawan, tidak pula Musa bin Nusayr meninggalkan negeri Maghribi dengan tidak meletakkan asas pengajaran Islam di dalamnya, kerana ia bukanlah seorang yang nekad mengadu untung nasib, atau perompak, ataupun orang yang hanya mengumpulkan rampasan perang dengan sebanyak-banyaknya. Musa ialah seorang pahlawan Islam dari orang-orang tabiin yang telah menurut jejak sahabat-sahabat Nabi dengan cara yang sebaik-baiknya. Ia seorang mubaligh yang menyiarkan agama Allah dalam sebuah negeri yang telah kukuh di dalamnya penyembahan berhala, dan dikuasai oleh raja perempuan ahli sihir.

Oleh yang demikian, ia telah meninggalkan dalam kalangan

<sup>1</sup> Kini dikenali sebagai Barce.

orang-orang Barbar di negeri Maghribi berbelas-belas ribu orang Arab, yang mengajar mereka membaca Qur'an, dan mendidik mereka dengan akhlak dan kebudayaan Islam, serta mendalami pengetahuan mereka dengan ilmu dan hukum-hukum Islam.

Kembalilah Musa bin Nusayr ke bandar al-Qayrawan (Tunis), bukan kerana ia hendak tinggal diam, tetapi untuk meletakkan asas-asas pertadibiran Islam di atas asas yang betul. Ia di sini mendirikan sebuah negara baharu yang telah muncul dari gelap-gelita (kufur dan syirik) kepada nur Islam yang terang-benderang.

Tenteranya telah bertambah besar disebabkan orang-orang Barbar yang telah memeluk Islam telah menyatakan diri di dalamnya, kerana mereka berhajat kepada gaji dan pemberian.

Pada masa itu mulailah Musa bin Nusayr menempa mata wang, untuk menggantikan mata wang Rom yang telah digunakan pada masa yang lalu di situ.

Cita-cita dan harapan Musa bin Nusayr mulai pula bertumpu ke laut tengah (Laut Mediterranean). Cita-citanya tidak terhenti kepada had tanah dan daratan tetapi menjalar ke sebalik ombak di laut. Ia pun menghantarkan satu angkatan laut ke pulau ((Mayurqah<sup>2</sup>)) yang terletak di timur Semenanjung Sepanyol. Anaknya 'Abd Allāh telah diangkat menjadi panglimanya. Angkatan Islam itu telah kembali dengan selamatnya dengan membawa rampasan perang yang tidak terhitung dari pulau itu. Tidak syak lagi angkatan laut Islam yang dihantarkan ke situ hanyalah sebagai menguji keadaan kawasan itu untuk tujuan yang lain, yang lebih besar lagi.

Kesukaran dan kepayahan lazimnya tidak juga akan membiarkan orang besar seperti Musa bin Nusayr itu, untuk menguji sabarnya dan kebolehannya mengambil

pendirian yang teguh, beriman dan tenang tenteram.

Daerah-daerah di Afrika Utara telah mengalami musim kemarau sehingga banyaklah binatang ternak dan tanaman-tanaman yang telah mati. Benda-benda makanan yang masih ada tidak mencukupi dan terlalu mahal. Orang ramai berasa cemas dan menjadi haru biru. Ujian ini amatlah berat kepada Musa bin Nusayr. Apakah yang akan dilakukannya? Sebenarnya ia dan kaumnya serta rakyatnya yang menjadi tanggungjawabnya di hadapan Allah 'Azza wa Jalla tidak mempunyai harapan lagi selain daripada bertumpu bulat-bulat kepada Allah *Subḥānahu wa Ta'ālā* yang memberi kelapangan dan mengurniakan rahmat yang melimpah-limpah.

Musa bin Nusayr pun memberi perintah supaya orang ramai berpuasa, sembahyang dan berdoa kepada Allah 'Azza wa Jalla, dan melupai pertentangan, perasaan dendam dan marah sesama sendiri. Mereka tertuntut memperbaiki keadaan mereka sehingga bersihlah hati mereka dengan taat, dan bersinar-sinarlah dia dengan perasaan kasih sayang, serta menjadi lembut dengan kejernihan. Pada saat itu doa mereka akan makbul.

Orang ramai dengan dipimpin oleh Musa bin Nusayr telah keluar ke padang sahara mengerjakan sembahyang dan berdoa meminta hujan. Tua muda, lelaki dan perempuan, serta kanak-kanak, termasuk juga binatang-binatang ternak ada belaka. Musa pun memisahkan kanak-kanak daripada ibunya, dan memisahkan juga anak-anak haiwan daripada ibu masing-masing pada saat itu kedengaran ratap tangis dan jerit pekik yang mengharukan, seolah-olahnya peristiwa itu berlaku di padang Mahsyar. Tinggallah mereka dalam keadaan itu hingga tengah hari.

Setelah itu Musa tampil ke hadapan menjadi imam sembahyang. Berdirilah sekaliannya mengerjakan sembahyang dengan

<sup>2</sup> Kini dikenali sebagai Majorca.

khusuk di hadapan Allah ‘Azza wa Jalla. Musa pun membaca khutbah, tidak disebutkan nama Khalifah di dalamnya sebagaimana yang lazim dibuat pada hari Jumaat. Tiba-tiba kedengaran satu suara dari baris belakang berkata:

“Wahai Ibn Nusayr, mengapa tuan tidak berdoa untuk *Amīr al-Mu’mīnīn*?”

Musa menjawab orang yang bersuara itu, katanya:

“Pada saat yang demikian ini tidak boleh berdoa melainkan kepada Allah Ta‘ālā semata-mata, dan tidak boleh disebut siapa-siapa pun selain daripada nama Allah ‘Azza wa Jalla!”

Maha Suci Allah! memang Allah Ta‘ālā tidak menghampaskan hati orang yang berdoa dan bermohon kepada-Nya, kerana ia telah berjanji dengan firman-Nya di dalam *al-Qur’ān al-Karīm*:

“*Wa idhā sa’alaka ‘ibādī ‘annī fa innī qarībun ujību da ‘wata al-dā’ī idhā da ‘ān.*”

Ertinya: “Dan apabila hamba-hamba-Ku bertanya tentang Aku kepadamu, maka bahwasanya Aku adalah hampir, Aku sedia memperkenankan doa orang yang berdoa apabila ia berdoa kepada Aku (dengan ikhlas dan bersungguh-sungguh).”

Hanya seketika, tiba-tiba orang ramai yang sedang menaruh sepenuh-penuhnya harapan akan rahmat dan belas kasihan Allah ‘Azza wa Jalla telah makbul doa mereka. Hujan turun mencurah-curah, orang ramai yang sedang dahaga telah dapat minum dengan sepuas-puasnya dan dapat memberi minum kepada binatang-binatang ternaknya. Dengan itu, tumbuhlah tanaman-tanaman dengan suburnya dan dapatlah mengeluarkan hasil yang mewah.

– Bersambung

## Doa

*Yā Ilāhī.*

Luhur, seluhur, perasaan suci putih.

Memohon restu penuh keinsafan, niat jernih.

Permintaan dari rasa mendalam hingga

kesedaran.

Gemilang masih meraba-raba, bias menekan

kekecewaan.

*Yā Rabbī.*

Keluhuran restu menjerit-jerit meminta.

Agar disampaikan hajat harmoni semata-mata cinta.

Istana restu, berpusat di satu.

Setiapku hubungkan jiwa penuh berair mata kalau.

*Yā Rahmān.*

Sedih memilu sukma menyayat jiwa.

Menanggung derita tak sanggup berketawa.

Kulahirkan di madah ini, jutaan pengharapan.

Inderanya alam, tetapi mana habuanku?

Ya Tuhan.

Sudak<sup>4</sup> termaktublah di lawḥ mahfūz sana?

Masih meraba-raba, tanpa insan, jangan bisa.

Sudah erat janji-Mu, untuk habuanku.

Dia tetap menyimpan seribu ramalanku.

Ya Tuhan.

Hamba pohon, runduk penuh jiwa keluhuran.

Ke persada, Ilahi matlamat seribu keanugerahan.

– Mimas Ros

<sup>3</sup> Perkataan sebenar ialah *al-dā’i*.

<sup>4</sup> Perkataan sebenar ialah Sudah.